

SPR yakin PRU-13 paling bersih, terbaik
Utusan Online
17 Januari, 2013

KUALA TERENGGANU 16 Jan. - Meskipun timbul pelbagai persepsi bahawa Pilihan Raya Umum Ke-13 (PRU-13) paling sengit, getir dan mencabar, namun Suruhanjaya Pilihan Raya (SPR) tetap yakin proses pilihan raya itu akan berlangsung dengan lancar, bersih dan terbaik.

Pengerusi SPR, Tan Sri Abdul Aziz Mohd. Yusof ketika memberi jaminan itu berkata, ini berdasarkan pelbagai langkah serta perubahan yang dilakukan setelah mendapat cadangan daripada jawatankuasa khas dalam usaha mengemaskini serta memperbaiki proses pilihan raya.

Beliau memberitahu, pembaharuan itu antaranya penggunaan dakwat kekal, undi awal, wujudnya akses media bagi parti-parti politik, pemerhati antarabangsa dan syarat pemakaian pas untuk memasuki pusat-pusat mengundi.

Jelasnya, begitu juga dengan para petugas media yang dibenarkan mengundi pos, selain kelonggaran kepada golongan orang kurang upaya (OKU) yang boleh ditemani rakan berbanding hanya saudara mara, sebelum ini.

"Apabila banyak pembaikan itu, takkanlah pilihan raya ini akan menjadi yang terburuk. Sebagai Pengerusi SPR, saya berhasrat menjadikan pilihan raya kali ini yang terbaik dengan adanya kerjasama padu daripada seluruh warga SPR dan pegawai serta penolong pegawai pengurus pilihan raya negeri.

"Dakwaannya bahawa Pilihan Raya Umum Ke-13 paling sengit, ganas, mencabar dan getir, itu hanya tanggapan. Mungkin betul mencabar kerana masing-masing ingin mempertahankan kerusi.

Tapi saya beri jaminan, walaupun getir dan panas, ia akan jadi pilihan raya umum yang terbaik," ujarnya.

Beliau berkata demikian ketika berucap menyempurnakan majlis penutup program Taklimat Kepada Pegawai Pengurus dan Penolong Pegawai Pengurus Pilihan Raya Zon Timur di Hotel Primula Beach Resort di sini hari ini.

Taklimat dua hari itu disertai lebih 300 para peserta dari negeri Pantai Timur yang bermula semalam.

Yang turut hadir Timbalan Setiausaha SPR, Datuk Noordin Che Ngah; Penasihat Undang-undang, Mohd. Azhar Mohd. Yusof serta Pengarah SPR negeri, Fakhru Razi Ab. Wahab.

Mengulas lanjut dalam sidang akhbar selepas itu, Abdul Aziz berkata, pilihan raya umum akan datang tidak akan menjadi yang terburuk jika semua pihak terutama pembangkang sentiasa mematuhi peraturan serta arahan ditetapkan.

"Kali ini tak akan menjadi yang terburuk, sekiranya kita semua ikut undang-undang, ikut arahan polis, PRU-13 akan jadi yang terbaik," jelasnya.

Beliau turut memberikan jaminan bahawa SPR akan memastikan proses pengiraan undi pada pilihan raya umum akan datang berjalan lancar, tidak seperti mana yang berlaku kesilapan semasa pemilihan Jawatankuasa Kerja Pusat (CEC) DAP bulan lalu.

Dalam perkembangan berkaitan, SPR buat pertama kalinya akan melantik 16 pertubuhan bukan kerajaan (NGO) tempatan sebagai pemerhati perjalanan PRU-13 tidak lama lagi.

Abdul Aziz berkata, pada masa sama, para pemerhati luar negara juga akan dilantik khususnya dari kalangan negara ASEAN kecuali Brunei, Singapura, Kemboja dan Laos.

Kesemua 16 NGO tempatan itu jelas beliau, terdiri daripada wakil bagi zon Semenanjung, Sarawak dan Sabah.

Katanya, zon Semenanjung akan diwakili oleh Institute for Democracy and Economic (Ideas), Merdeka Centre, Center for Public Policy Study dan Majlis Belia Malaysia (MBM).

"Zon Sarawak pula diwakili Pertubuhan Belia Islam Nasional (Pembina), Persatuan Kebangsaan Melayu Sarawak, Persatuan Kebangsaan Orang Ulu Sarawak, Saberkas, Sibu Chinese Chambers of Commerce and Industry.

"Begitu juga Persatuan Melanau Sibu, Persatuan Cina Miri, Persatuan Dayak Miri dan Federation of Orang Ulu Association Malaysia manakala Sabah diwakili Persatuan Sejarah Malaysia, Majlis Belia Sabah serta Persatuan Cina Sabah," katanya.

Mengenai pemerhati antarabangsa, Abdul Aziz berkata, langkah selanjutnya akan diuruskan oleh Kementerian Luar.

"Untuk wakil-wakil negara ASEAN, pihak Wisma Putra akan nasihatkan SPR dan ia belum pasti bila. Tapi setakat ini belum dimuktamadkan oleh Kementerian Luar," jelasnya.

Beliau turut menarik perhatian bahawa pihaknya percaya jumlah pemilih berdaftar akan meningkat menjadi 13.3 juta orang berbanding seramai 13.1 juta orang pada suku ketiga tahun lalu.

Hakcipta Terpelihara © UTUSAN MELAYU (M) BERHAD

Source: http://www.utusan.com.my/utusan/Politik/20130117/po_02/SPR-yakin-PRU-13-paling-bersih-terbaik